

दिनांक 24.03.2025

समय: 18.45 बजे

- राजस्थान दिवस समारोह रा कार्यक्रम काल ऊं प्रदेशभर मांय व्हेला—मुख्यमंत्री भजनलाल शर्मा रो बाड़मेर मांय मातृवंदन महिला सम्मेलन रो उद्घाटन करण रो कार्यक्रम।
- राज्यपाल हरिभाऊ बागडे पाणी भेळो करण माथे जोर दीनो— टोंक अर कोटा मांय जिला स्तर रा अहलकारां सागे मीटिंग कीनी।
- विश्व क्षय रोग दिवस रे मौके प्रदेशभर मांय जन जागरुकता कार्यक्रम—सक्षम लोगां ऊं निःक्षय मित्र बणबा री अपील।
- राज्य मांय केई ठौड़ां गर्मी रो असर बध्यो—काल पाकिस्तान ऊं लाग्योड़ां सरहदी जिलां मांय तेज बायरो बाजण रा आसार।

000

राजस्थान स्थापना दिवस ई साल ई धूम—धाम सागे मणायो जावेला। ई मौके राजधानी जयपुर समेत न्यारी—न्यारी ठौड़ां कार्यक्रम राख्या जावेला। राजस्थान स्थापना दिवस रा सिलसिला मांय काल ऊं 31 मार्च ताई न्यारा—न्यारा राख्या जावेला। मुख्यमंत्री भजनलाल शर्मा रो काल बाड़मेर मांय मातृ वंदन महिला सम्मेलन ऊं इण री सरुआत करण रो कार्यक्रम है। 26 मार्च ने बीकानेर मांय किसान सम्मेलन अर एफपीओ कार्यक्रम राख्यो जावेला। 27 मार्च ने भरतपुर मांय गरीब और अंत्योदय समारोह राख्यो जावेला। 28 मार्च ने भीलवाड़ा मांय सुशासन समारोह अर 29 मार्च ने कोटा मांय युवा और रोजगार उत्सव व्हेला। राजस्थान दिवस रे मौके 30 मार्च ने जयपुर मांय मोटो जळसो अर 31 मार्च ने निवेश उत्सव राख्यो जावेला। राजस्थान दिवस रा सिलसिला मांय जयपुर रा जवाहर कला केन्द्र मांय काल न्यारा—न्यारा रा कार्यक्रम सरु कर्या जावेला। राजस्थानी सिनेमा महोत्सव सागे इण री सरुआत व्हेला। 30 मार्च ताई चालण वाळा ई आयोजन रे दौरान गीत—संगीत, नाच—गाण अर नाटक समेत न्यारा न्यारा आयोजन राख्या जावेला। जवाहर कला केन्द्र रा शिल्पग्राम मांय काल ऊं क्राफ्ट अर फूड बाजार ई लगायो जावेला।

000

मुख्यमंत्री भजनलाल शर्मा आज जयपुर मांय जन—सुणवाई कीनी। श्री शर्मा सोशल मीडिया पोस्ट रे जरिये आ जाणकारी दीनी। मुख्यमंत्री बतायो के वे वां रा रहवास माथे नियमित तौर ऊं व्हेवण वाळी जन—सुणवाई रे दौरान लोगां की समस्यावां सुणी अर अहलकारां ने समस्यावां रो बेगो ई निपटारो करण बाबत् कह्यो।

000

राज्यपाल हरिभाऊ बागडे पाणी बचावण सारु गांव का पानी गांव में, खेत का पानी खेत में राखण माथे जोर दीनो है। वे आज टोंक मांय जिला स्तर रा अहलकारां सागे मीटिंग मांय बोल रह्या हा। श्री बागडे कह्यो के जल जीवन मिशन रा तैत हर पिरवार ने पीवण रो साफ पाणी मुहैया करायो जावणो चाहिजे। वे प्रधानमंत्री ग्राम सड़क योजना रा तहत दूर रा गांवां अर ढाणियां ने तैय बगत मांय सड़कां ऊं जोड़णो तैय करण रा हुकम दीना।

राज्यपाल महिलावां ने माली तौर ऊं खुद रे पाण ऊबी करण माथे खास जोर देता थकां कह्यो के राजीविका रे मार्फत काम कर रही खुद सेवक समूहां री महिलावां कानी ऊं बणायी ज्या भांत—भांत रा सामान री उचित मार्केटिंग री व्यवस्था तैय करणी चाहिजे। वे आंगनबाडी केन्द्रां माथे बच्चां रा शरीर अर दिमाग रा विकास अर टाबरियां री उपस्थिति अर पोषण रो खास ध्यान राखण बाबत् ई कह्यो। इसके बाद राज्यपाल कोटा पहुंचे। उन्होंने जिला अधिकारियों के साथ बैठक ली।

000

सरकार कांदा ने दिसावर मांय बेचण परां लागण वाळो 20 फीसदी शुल्क हटा दीनो है। केन्द्रीय कृषि मंत्री शिवराज सिंह चौहान आज नई दिल्ली मांय आ जाणकारी दीनी। श्री चौहान कह्यो के इण ऊं किसानां री उपज बिना शुल्क दुनिया भर रा बाजारां मांय पूगायी जा सकेला अर वां ने बत्तो मोल मिल सकेला। वे कह्यो के केन्द्र सरकार किसानां रा भलां री मर्जी राखे है अर वां ने चोखो मोल दिरावण माथे सरकार रो खास ध्यान है।

देश मांय कांदा री उपलब्धता तैय करण सारू लारला साल 13 सितम्बर ने 20 फीसदी निर्यात शुल्क-कस्टम ड्यूटी लगायी ज्यी ही। कृषि अर किसान कल्याण मंत्रालय रे मुजब ई साल उनाळू साखां री उपज दो करोड़ 27 लाख मीट्रिक टन व्हेवण रा आसार है, जो लारला साल री तुलना मांय 18 फीसदी बत्ती है।

000

जेल प्रहरी भर्ती 2018 रा पेपर लीक मामला मांय एसआईटी कानी ऊं जांच पाछे आरोपित संदीप ने गिरफ्तार कर लियो ज्यो है। एसओजी रा अतिरिक्त महानिदेशक वी.के. सिंह आज जयपुर मांय खबरनवीसां ने आ जाणकारी दीनी। वे बतायो के आरोपित कानी ऊं इम्तिहान ऊं पैली उम्मीदवारां ने पेपर मुहैया करावण री शंका है। एस.ओ.जी रा ए.डी.जी. बतायो के ई मामला मांय दो और लोगां ने ई पकड़ी ज्यो है, ज्यां ऊं पूछताछ करी जा रही है।

000

टी.बी. री बीमारी रो सामो करण सारू दुनिया भर मांय करी जा रही कोशिशों रा पाण साल 2000 ऊं हाल ताई करीब सात करोड़ नब्बे लाख जण री जान बचायी ज्यो है। विश्व स्वास्थ्य संगठन-डब्ल्यूएचओ टी.बी. री बीमारी ने तुरत खत्म करण री ज़रूरत माथे ज़ोर दीनो है। पेश है एक रपट—

000

विश्व क्षय रोग दिवस रे मौके प्रदेश री जनता मांय ई जाग जगावण सारू न्यारा-न्यारा कार्यक्रम राख्यो ज्यो। रैली, नुक्कड़ नाटक अर न्यारी-न्यारी होड़ों रे मार्फत टी.बी. री बीमारी ऊं बचाव रो संदेश दियो ज्यो। ई सागे ई लोगां ऊं निःक्षय मित्र बणवा री अपील करी ज्यो। दौसा मांय टी.बी. रा मरीजां ने पोषण किट दिया ज्यो। जिला क्षय अधिकारी बतायो के दौसा जिला री 76 ग्राम पंचायतां रे टी.बी. मुक्त व्हेवण रो ऐलाण कर दियो ज्यो है।

000

नागौर जिला मांय हाईटेंशन लाइन रा टूट्योड़ा तार ऊं अड़ र करंट लाग जावण रे कारण तीन जणा री मौत व्हे जावण रा मामला मांय अजमेर डिस्कॉम प्रशासन एक जूनियर इंजीनियर अर लाइनमैन ने मुअत्तल कर दीना है। डिस्कॉम रा तकनीकी निदेशक मुकेश चन्द बाल्दी बतायो के मरण वाळां रा पिरवार वाळां ने पांच-पांच लाख रुपया रो मुआवज़ो दियो जावेला। वे बतायो के मामला री जांच सरू कर दीरीजी है। हादसो काल खींवर कने मुंदियाड़ गांव मांय व्हयो हो जठे मोटरसाइकिल सवार तीन जणां री बिजली रा टूट्योड़ा तारां री फेंट मांय आ र झुलस जावण ऊं मौके ई मौत व्हे गयी ही।

000

चैत महीना मांय भरण वाळा करौली जिला री नामी शक्तिपीठ कैलादेवी रा मेळा री तैयारियां आखिरी दौर मांय चाल रही है। खास मेळो 27 मार्च ने सरू व्हेला। म्हाणा खबरनवीस बतायो के मेळा मांय सिरकत करण सारू मोटी तादाद मांय जातरू पूगण लाग्यो है।

000

प्रदेश मांय अपराधां माथे कबू करण सारू सामुदायिक पुलिसिंग ने बणावो दियो जा रह्यो है। ई रा तैत कोई ई मर्जी ऊं पुलिस मित्र बण सके है। राजस्थान पुलिस जनता ऊं पुलिस मित्र योजना ऊं जुड र समाज ऊं अपराधां ने खत्म करण मांय मदद करण री अपील कीनी है। पुलिस मित्र बणवा सारू राजस्थान पुलिस रा वेब पोर्टल रे जरिये अर्जी दी सके है। कार्य क्षमता अर दक्षता रे मुजब 24 न्यारा-न्यारा हलकां मांय पुलिस मित्र बण र काम कर्यो जा सके है।

000

राज्य रा आतूणी हलकां रा सरहदी जिलां मांय काल ऊं जोरदार बायरो बाजण अर बादळा मण्ड्यो रेहवण रा आसार है। आवता दो दिन मांय पारा मांय खास बदलाव रा आसार नी है। ई पाछे तापमान मांय दो ऊं तीन डिग्री सेल्सियस ताई री कमी आ सके है। ई बीचे, आज सवाईमाधोपुर अर झालावाड समेत केई ठौड़ां पारो चढ़ जावण ऊं गर्मी रो असर तेज व्हे ग्यो। लारला 24 घंटा मांय बाड़मेर मांय पारो 40 डिग्री सेल्सियस ने पार कर ग्यो। म्हाणा खबरनवीस बतायो के मार्च महीना मांय ई गर्मी रो असर तेज व्हेवण लाग्यो है।

जैसलमेर मांय 39 दशमलव 8, जालौर मांय 38 दशमलव 8 अर जोधपुर मांय 38 दशमलव 1 डिग्री सेल्सियस अधिकतम तापमान दर्ज करी ज्यो। भीलवाड़ा, कोटा, चित्तौड़गढ़, बीकानेर, चूरू, श्रीगंगानगर, धौलपुर, नागौर, सिरौही, फतेहपुर, दौसा अर पाली मांय ई अधिकतम तापमान 36 डिग्री सेल्सियस ऊं ऊंचो दर्ज करी ज्यो।